

Festival infantil himno y bandera prome anochi



Dos dia mi a keda haya yamadan tocante e Festival un Canto na nos himno y bandera 2012 na Centro di Bario Tanki Leendert. "Ki dia bo ta skirbi di e muchanan?" ta entre otro e preguntanan. Mester corda bon cu mi a pasa 3 anochi cu e festival aki. Diadomingo mainta core bay trabao, corta trabao merdia pa bay graba programa di mucha pa television, core bay trabao, caba cu mi tareanan, y rush mes ora pa cas pa prepara pa bolbe Centro di Bario. Dialuna bo ta na trabao, atardi bo tin un of dos cos riba programa y corda cu 6 or mester ta na Fort Zoutman y 8.30 or den un reunion pa e siman nos dilanti, y diamars sigui cu cabez yen. Ayera sinembargo ma' haya oportunidad pa skirbi di e prome anochi cu nos infantilnan di 6 pa 8 aña.

Zedayne Gomez a duna e festival e comienzo cu tabata tin mester pa haci e anochi agradable, ora cu el a sclama na Upgrade Music: "Los e cos pa mi!" prome cu su wals "Mi ta stima mi Bandera" cumenza. El a cumenza cu poco nervio den su voz pero a recupera y na final tabata den dje, pero ya e nerviosismo a afecta su cancion cu tabata bunita presenta. Xenon Daal cu a presenta seguidamente cu e danza "Conoce bo isla" a sorprende mi. E hobencito aki cu su 6 ½ aña a debuta manera un cantante experiencia (mama cu papa tambe ta cantantenan) y a guia nos rond di Aruba cu su cancion educativo. Cada vez cu e puntra "Unda mi ta?" e coro ta contesta mencionando un lugar di nos isla. Masha agradable tabata presentacion di Xenon y... tene bista riba e



hobencito aki pa den futuro. Cu e mes banda a canta Mary Ann Maduro cu a presenta e wals "Ta nos dushi hendenan". E cancion riba su mes tabata tin bunita melodia y Mary Ann a saca for di dje tur locual e tabata por. E unico observacion cu mi tabata tin tabata cu a usa "ta nos dushi hendenan" mucho den e cancion. Na final mi a conta 28 biaha.

"Stima balora y respeta", danza canta pa e hobencita Zhaiska Kock ta un di e cancionnan cu na principio di e festival a dal mas duro. Na e momento ey mi a pensa cu esey ta e cancion cu mester wordo gana, pa su letranan, su melodia, compas y su presentacion. Esaki ainda sin menciona e voz precioso. Finalmente a resulta cu Zhaiska toch no a logra e 6 punto necesario pa cay den premiacion ya cu esnan cu a gana a gana otro cu diferen-

cia di 5 punto cada.

Rincon Boyz a compaña despues e cantante Rayxien Trimon cu a canta di nos "Isla Bendiciona". Rayxien a haci bon trabao cu su interpretacion di e wals aki sinembargo no a logra suficiente punto pa e premiacion pero a demostra cu mester keda tira bista riba dje pa futuro.

Mi a gusta tambe con Juean Orman a presenta su wals "Nos bandera, flor di Libertad". E no a logra suficiente punto pa clasificacion pa premio ya cu nervio lo a domina su voz y cu el a bay for di tono na dado momento pa wanta tambe cu e coro. E tambe nos lo keda mira mas sigur den e concursionan aki pasobra "e tin e briyo".

Cu e agrupacion Tipico Stima-mi, a presenta Thahirah Weaver. Di dje por a spera un bon presentacion ya cu ultimo dos aña el a impone su number den diferente concurso di canto infantil. Thahirah a canta e tumba "Mi presentacion" y aki tambe por a sinti cu e lo por cay den premiacion, mirando tur esnan cu a presenta prome cu ne. E coro a habri cu: "un 10 (tien) mi kier score, un 10 mi kier score pa mi presentacion". Esaki no pa e concurso, sino pa su presentacion den clas riba su tema Aruba. Ora juffrouw a bise pasa dilanti el a duna su presentacion pa e muchanan den clas contando historia di Aruba for di e indiannan, cuebanan, pasa pa libertador, bandera y himno y na final ta puntra juffrouw "juffrouw cuanto mi a score? Aruba mi a presenta".

Thahira a bin termina na di dos lugar den e concurso di 6 pa 9 aña.

Tipico Macuarjima a cumenza compaña Jayleen Croes. Aki mi a spanta ora mi a ripara riba papel cu e cantante ta Jaderick Croes y compositor ta Jayleen pero a resulta net contrario. Masha bunita Jayleen a presenta su tumba "Nos cultura



ta grandi" y cu voz precioso y bon acompaña, locual ta haya cu tur e cancionnan di e tipico aki. Finalmente ta Jayleen mes a bin termina como ganador di e concurso di 6 pa 9 aña y nos lo sigui scuche pa hopi tempo mas den concursionan aki.

Brandley Rincones tambe a presenta cu Tipico Macuarjima y a canta e wals "Cu respet". E cancion aki tambe mi a spera di mira den e premiacionnan ya cu tabata un cancion bon canta, cu bon letra, cantante cu bon dominio di voz, bon articulacion y e melodia tambe tabata precioso. Brandley tabata tin e mala suerte cu el a cay net for di e premiacionnan pa falta di algun punto mas. Nos lo mire y scuche atrobe y su number ta graba caba pa e concursionan aki.

Zarel Yarzagaray a cera e prome anochi cu e danza "Ami ta rico" compaña pa Tipico Alegre Kadushi largo. Mi tin cu bisa cu mi a gusta e cancion aki cu mi a mira cu bon chens di cay den finalistanan tambe. Na final a resulta cu toch Zarel a ocupa e di tres lugar y cu e margen di 5 punto riba esun di 4. Manera a wordo splica na final, e prome 5 nan a termina cada un cu un margen di 5 punto riba otro, pa muestra con preta e concurso tabata.

Un pabien ta bay na e 3 ganadonan so, pero na cada un di e 10 cantantenan cu a brinda e publico un anochi masha placentero lagando nan cu gana pa mas y mas.

Juby Naar.